

Иса Месигъ дидедиз хьун

1 Гъа йикгъара чилел алай къван инсанар сиягъдиз къачун патал Август пачагъдила эмир атана. 2 Им Квиринияди Шамда набвал ийизвай ч'авуз сад лагъай сефер яз халкъ сиягъдиз къачузвай вахт тир. 3 Чпин т'варар кхъиз тун патал, вирибур чпин бубайрин ватан тир шегъерриз хъфена. 4 Жалилиятдин Назарет шегъердай Ягъуд виляятдиз, Давуд пачагъдин ватан тир Бейтлегъем шегъердиз Давудан сихилдикай тир Юсуфни фена. 5 Ам аниз ада лишанар кутунвай руш Майрамни галаз чпин т'варар сиягъда тун патал фейиди тир. Майрам к'вачел заланзавай. 6 Абур Бейтлегъемда авайла, Майрамаз аял жедай вахт алукъна. 7 Ада сифте аял хана, аял пекерик кутуна, мугъманханада чка тахъуниз килигна, т'уна эцигна. 8 Абур акъвазнавай чкадин мукъув гвай ч'ура чпин суъруяр хуъзвай чубанар авай. 9 Садлагъана абурун витик Аллагъдин Малаик акъатна. Абур алай чка Аллагъдин баркалладин нурари къатиз ишигълаван авуна. Чубанриз лап пис кич'е хъана. 10 Абуруз Малаикди лагъана: «Кич'е жемир, за квез Израилдин вири инсанар шадардай зурба муштулукъ гузва: 11 кье Давудан шегъерда куън Къутармишдайди дидедиз хъанва, Амни Агъа Месигъ я. 12 Ингъе квез субут: т'унай квез пекерик кутунвай аял жагъида». 13 Садлагъана Малаикдихъ галаз, Аллагъдиз шукурар ийиз-ийиз атай цаварин аскерри лугъуз хъана: 14 «Аллагъдиз цавар ац'ай къван шукур хъурай, Аллагъ чпелай рази бурун арада чилер ац'ай къван ислягъвал хъурай!» 15 Малаикар цаварал хъфейла, чубанри сада садаз лагъана: «Ша чун Бейтлегъемдиз фин, ана вуч хъанат'а килигин. Чаз Аллагъди ганвайди вуч хабар ят'а акван». 16 Чубанар аниз тади кваз атана акъатна. Абуруз Майрам, Юсуф ва т'уна авай бала акуна. 17 Бала акурла, чубанри малаикди чпиз Адакай лагъай гафар анал алайбуруз тикрар хъувуна. 18 Чубанри баладикай авур ихтилатрин ван хъайи вири тажуб хъанай. 19 А гафар Майрама вири вичин рик'е туна хуъзвай. 20 Чпиз лагъайди чпин вилериз акваз-акваз къилиз акъуддай Аллагъдиз чубанри шукурар авуна ва

Адан тарифар ийиз-ийиз элкъвена хъфена.